



sept





LE
DIALOGUE

DE CALVIN ET DE

Luther reuenus du nou-
veau monde.

Sur les affaires de l'Europe.

25

M. DC. XXII.

X

Case

F

39

.326

1622 di

THE NEWBERRY
LIBRARY



LE DIALOGVE DE

*Caluin & de Luther reuenus du
nouveau monde, sur les affaires
de l'Europe.*

LA nuit auoit desia du sombre
manteau de l'obscurité enui-
ronné l'Vniuers, & la Lune trainee
sur son chariot par deux courriers
humides espanchoit par tout vn
effroyable silence, qui se glissant
dans les paupieres des hommes &
des bestes, leur faisoient respirer les
doux appas d'un delectable som-
meil, quant le Songe (Deité phan-
tastique) me representa diuers chi-
meres deuant les yeux, soit que le
iour precedent i'eusse feuilléré les
affaires de ce temps, & les mouue-

mens de l'Europe, ou que i'eusse eu l'esprit preoccupé d'autres imaginations.

Il me sembloit que i'entre-voyois l'ombre de Calvin, & de Luther contester ensemble pour le faict de leur Religion, & de tous ces nouveaux remuemens, & que Luther avec son venerable grouin & sa barbe faicte en escrottoire, commença de ceste sorte.

Luther.

Compere mon amy (disoit M à Calvin, sans doute qu'ils ont engendré quelque demon ensemble, puis qu'il y a du comparage) ie ne sçay desormais comme va tout le succez de nos affaires, ie viens d'apprendre d'un courrier d'Alemagne, que nostre pauvre Eglise est bien rauagee, on nous veur oster nostre liberte & nous empecher de viure

5
selon les bonnes loix & preceptes
que nous dicte le liberal arbitre, c'est
vne chose de dure digestion, encor
principalemēt aux Epicuriens com-
me moy, si cela fut arriué de mon
temps, & que l'Empereur Charle le
quint eut vſé des mēsmes rigueurs
enuers ceux qui m'ont ſuiui, toute
noſtre Eglise, qui ne faiſoit à lors
que de naiſtre eut eſté renuerſee de
fonds en comble.

Caluin.

En eſtes vous là logé, compere
mon amy, vous n'auēz que faire de
vous plaindre, mais bien pluſtoſt
mes pauures enfans ont iuſte ſuiect
de gemit parmi tant de trauerſes que
leur donne tous les iours le Roy de
France, combien croyez vous depuis
deux ans ſeulement qu'on les a atta-
qués, qu'il y en ſoit deſcēdu dans les
grottes obſcures de l'Acheron, il eſt

impossible de vous l'expliquer, & pluſtoſt aurois ie nombré les feux qu'on voit eſclater dans le ciel, quád la nuit a noyé les rayons du Soleil ſous le courant des ondes, i'aurois pluſtoſt conté le ſable de la mer, & les flots qui abordent au riuage de Calais, quand la tempeſte ſe leue du coſté d'Angleterre, que de dire la moindre partie de nos malheurs & des deſaſtres qui ont agité nos pauvres Eglises de France depuis deux ans & demy.

Luther.

Il m'eſt impossible, quoy que vous diſiez de croire que vous ayez ſouffert plus de fatigues que nous, toute la l'Alemagne eſt ruinee, tant de batailles donnees contre nous, tant de rencontres, ſieges, perte de places, priſes de villes & mille autres traverſes que nous ont donnez

les Imperiaux, sont plus que suffisans
tesmoignages, & reliques des infor-
tunes que nous auons resseny de-
puis trois & quatre ans, de façon
qu'il semble à voir que toute l'Euro-
pe se fust bandee contre nous, car en
mesme temps de tous costez on
nous a attaqué, ce qui a esté cause de
nostre totale ruine, car nos forces
estant disiointes & desunies, il ne
falloit esperer qu'une desolation ge-
nerale de nostre Eglise, on nous a
couru sus, & ceste vnion qui se pro-
metoit de reioindre & remettre en
son entier les anciens statuts de la
primitiue Eglise, a esté en peu de
temps rompue par l'oppression de
nos haineux.

Caluin.

Puis que nous sommes entrez
sur ce discours, voyons la suite de
nos malheurs, & contemplons le-

quel de nous deux a plus iuste ſuict
 de ſe plaindre. Le premier echee
 qu'on nous a donné en France, ç'a
 eſté la reſtitution des benefices en
 Bearn, de laquelle nous auions de-
 ſtourné touſiours l'exécution, pro-
 longéas à noſtre poſſible vne action
 ſi rigoureuſe aux Noſtres. Ce qui fut
 pourſuiui pourtant par nos ennemis
 avec tant d'auantage qu'ils obtin-
 drent du Roy la main leuee deſdits
 benefices, quels reſſentimens de
 douleurs, croyez vous que nous
 euſmes pour lors, qu'elle amertume
 au cœur eurent nos pauvres enfans,
 qui durant cinquante ans auoient
 iouy deſdits benefices, cela eſt fort
 facile de ſ'imaginer, ce ſont de
 poignantes pointes que nous reſ-
 ſentons d'un tel deſaſtre, encore ſi
 apres ladicte main leuee on nous eut
 laiſſé viure dans noſtre ancienne
 liber

liberté. Mais en mesme temps (ie ne
 peux que ie ne souspire, quant ie me
 remets ceste histoire deuât les yeux)
 le Roy y entra avec toutes ses forces,
 deposseda les Anciens Magistrats &
 Gouverneurs, se saisit de toutes nos
 places sans coup ferir, tant de forte-
 resses que nous auions furent em-
 portées? ha miserable fortune, que
 tu nous fis bien ressentir alors les
 traiçts de ta cruauté! Nous abismant
 dans vne mer si orageuse, que celle
 où nous fumes alors!

Luther.

Voudriez vous accompagner ceste
 ruine à la desolation vniuerselle que
 nous auons senti dâs le Palatinat?
 Combien de places nous a emporté
 de haute lute ce Marquis de Spino-
 la? quel rauage a fait Cordoüa dans
 l'estenduë de ceste Prouince, il ny a
 lieu où il n'ait laissé des Marques de

sa main foudroiante, les champs furent encor sous les fleuves de sang qui arrousent les campagnes, toute ceste contree auparavant l'ornement de l'Allemagne, est maintenant desolée il n'y a pas vn pauvre terre qui eust esté exempt des foudres de cest Espagnol, par tout où il a passé tout est rauagé, le feu, le fer, & le sang ont esté compagnons oculaires de ses victoires, & de tant de triomphes qu'il a accumulé de nos despoüilles, de maniere qu'on peut dire qu'il n'y a point vne place où il n'eut fait inonder le rauage de son courroux, & ce qui est de plus miserable en cecy, c'est que la France ne nous a apporté aucun secours, nonobstant les esperances que nous en auons conceues.

Caluin.
Secours (comper mon amy) hélas elle n'auoit garde de vous secourir,

mes pauures enfans ont eu assez de
 traueses sans prester secours aux au-
 tres, le moyen qu'on vous eut presté
 secours, que mesme on l'a refusé aux
 Grisons, aux Venitiens & à ceux de
 Iulliers qui estoient sous la protectiō
 des François. C'estoit à nous à qui il
 falloit prester secours, le Roy estant
 reuenu de Bearn on commença à ne
 plus parler qu'en mots rompus, & à
 minuter la ruine totale des pauures
 freres en Christ; Nous fumes l'obiet
 total de tous les discours du pont
 neuf, on commença à nous attaquer
 par tout. Saumur qui estoit en la gar-
 de du Plessis-Mornay ouurit les por-
 tes au Roy, saint Iean d'Angely vit
 ses murailles & ses fortifications par
 terre, la Rochelle se vit inuestie par le
 sieur d'Espernon, Montauban attra-
 qué, Clerac, Albiac, Nerac, Bergerac,
 Cadenac, Moyssac, Figeac, & vne

infinité d'autres villes rédues. Ce fut à lors où nous eusmes à souffrir, le Roy emporta plus de soixante fortes places en ce second voyage, reseruant le reste pour ceste année icy, où il en a pris plus de quarante.

Luther.

Encor trouue ie que vos batailles, vos assauts, escarmouches & rencontres, ne sont point si sanglantes que les nostres, quand ie me souuiés de la bataille de Prague, ie ne peux que ie ne fonde en larmes, de voir tant de pauvres soldats succomber sous le faix de la milice, la ville prise, le Palatin chassé de ses terres & possessions, tout mis au pillage, nos maisons ruinees, nos Temples brisez, nos biens pillez, & tant de bonnes villes mises au sac, cela est de dure digestion (compere) principalement aux pauvres gens comme nous qui

ne pouuons à peine respirer parmi
tant de malheurs & d'infortunes
où nos sommes enseuelis tous les
iours.

Caluin.

Vous parlez de la bataille de Pra-
gue, voulez vous voir bataille plus
sanglante que celle qui se fit dans
l'Isle de Rié, où tous les nostres fu-
rent la proye des ennemis, & ense-
uelis sous les ondes de l'Océan,
quelle plus funeste iournee pour-
roit on marquer en nos ephemer-
ides, quel iour plus sanglant nous
eussent peu filer les destins! ah com-
pere, compere, les sanglots s'entre-
coupent dans ma bouche, à peine
puis-je vous declarer la centiesme
partie du malheur où nous nous vi-
smes reduis pour lors, il est bien vray
que le Sieur de Soubise auoit fait de
grands degasts dans le Poitou: mais

helas il le paya bien cherement, car il vit (ou il ne tint qu'à luy de le voir) tous ses gens estendus sur la place, faute de n'auoir preueu l'orage qui les menaçoit, l'Océan en est encor tout rouge tant ceste defaictte fut cruelle, & puis allez mesurer vos defastres aux nostres, cela ne se peut faire compere.

Luther.

Ie n'ay faict que commencer, ie ne vous ay point encor parlé des affronts que nous auons receus du Comte de Buquoy, du Baron de Tilly, du Duc de Bauiere & de tous les autres Imperiaux qui ont renuersé tous les bons desseins que nous auions de faire renaistre l'ancienne splendeur de la primitive Eglise qui auoit erré l'espace de quatorze cens ans, ne s'estant trouué durant le terme vn seul homme de merite com-

me Luther qui par sa doctrine eut
 peu repurger les fautes comme j'ay
 faict de mon temps, où par ma so-
 brieté j'ay r'amené toute l'Allema-
 gne, comme vous par vostre chasteté
 toute la France au sentier de la vraye
 Eglise.

Caluin.

Compere mon amy le cœur me
 faut les sanglots m'estouffent, les
 soupirs m'acablent, retournons
 nous en en nostre demeure ordinai-
 re, aussi bien ne puis ie plus voir tant
 de deffastres tomber sur mes freres &
 sur mon cher troupeau, facent les
 destins ce qu'ils pourront, ie m'en
 mets hors,

the first of the month of
the year of our Lord
the first of the month of
the year of our Lord
the first of the month of
the year of our Lord

the first of the month of
the year of our Lord
the first of the month of
the year of our Lord
the first of the month of
the year of our Lord
the first of the month of
the year of our Lord

